

Oqaluuserisassanut nassuiaat.

(Inatsisartut Siulittaasuut)

Inuussutissarsiornermut Ataatsimiititaliaq qinnuteqarpoq oqaluuserisassani immikkoortut 49 aamma 100 aappassaaneerneqarnissaasa 2017-imi upernaakkut ataatsimiinnermut UPA2017-imut kinguartinneqarnissaannik.

Immikkoortoq 49: Ukiut qulit ingerlaneranni angujartuaarneqartussamik nunatsinni suliffeqarfinni sulisorisat sapinngisamik amerlanerpaat nunatsinneersuunissaat siunniullugu, Naalakkersuisut UPA 17-mut saqqummiunneqartussamik periusissiamik suliaqarnissaminut peqquneqarnissaannut Inatsisartut aalajangiiffigisassaattut siunnersuut.

Immikkoortoq 100: Namminersorlutik Oqartussat iluanni aammalu suliffeqarfiit Namminersorlutik Oqartussat pigisaasa iluanni atorfilittat qullersaasa tullersortaasalu 60 - 70 %-ii piginnaasaqarnikkut tulluartut marlunnik oqaaseqartuunissaat anguniarlugu ukiut qulit ingerlaneranni sulisussarsiuissinermit tunngaveqartitsisussamik atorfinitsitsisarnermut aalajangersimasumik anguniagaqarnissamut periusissiornissamut, ilinniartitaanermullu ilinniaqqinnermullu periusissiamik UPA 2017 sioqqullugu Naalakkersuisut saqqummiussaqaqqullugit peqquneqarnissaannik Inatsisartut aalajangiiffigisassaattut siunnersuut.

Inatsisinut Ataatsimiititaliaq taamatuttaaq qinnuteqarpoq oqaluuserisassani immikkoortup 111-p UPA2017-imut kinguartinneqarnissaannik.

Immikkoortoq 111: Inuup sananeqaataasa ilisarnaataannik qitiusumik nalunaarsuiffik pillugu inatsisip atuutilersinneqarneranik peqqussutissamut siunnersuut aamma inuup sananeqaataasa ilisarnaataannik qitiusumik nalunaarsuiffik pillugu inatsisip, eqqartuussisarneq pillugu inatsisip aamma qamutininik assakaasulinnik nalunaarsuisarneq pillugu inatsisip allangortinneqarnerannik inatsimmi § 1-ip Kalaallit Nunaannut atuutilersinneqarneranik peqqussutissatut siunnersuummut (Naalagaaffinnik Den Europæiske Unionip avataneersunik inuup sananeqaataasa ilisarnaatai, pussuit ipaasa assilineqarnerinik aamma qamutit pillugit

paasissutissanik paarlaateqatigiittarneq) Namminersorlutik Oqartussat oqaaseqaateqarnissaat pillugu Inatsisartut aalajangiiffigisassaattut siunnersuut.

Oqaluuserisassani immikkoortunut 93-imut, 63-imut 90-imullu Nunanut Allanut Sillimaniarnermullu Ataatsimiititaliap isumaliutissiissusiornera naatsorsuutigisamit siusinnerusukkut pimmat oqaluuserisassat pineqartut aappassaaneerseqarnissaat novembarip ulluisa 21-anniit 17-annut siuartinneqarpoq.

Immikkoortoq 93: Kalaallit Nunaata inuiaqatigiillu kalaallit amerikamiut Kalaallit Nunaanni sakkutooqarnerat annertunerpaamik pissarsiaqaatigalugulu iluaqutigisinnaanera qulakkeerniarlugu ataatsimoorussamik danskit/kalaallillu USA-mik isumaqatiginninniarnissaannik Naalakkersuisut peqquneqarnissaannik Inatsisartut aalajangiiffigisassaattut siunnersuut. Naalakkersuisut Illersornissamut Isumaqatigiissut 1951-imeersoq tamatumalu kingorna tapiliunneqartut naapertorlugit USA-p Nunatsinni suliaqartarnerini nunatsinnut erseqqissunik iluaqutaanissaa sulii sulissutigissavaat , tassunga ilanngullugu amerikamiut sakkutooqarfikui sanaartukkallu allat qimaannarneqarnikut pillugit avatangiisitigut akisussaaffiup paatsuugassaannngitsumik inissinneqarnissaa, pisariaqarpallu tapiliussamik nutaamik isumaqatigiinninniarnermik imaluunniit Illersornissamut Isumaqatigiissutip 1951-imeersup isumaqatiginninniutigineqaqqinnissaanik piunasaqaateqarlutik.

Immikkoortoq 65: Illersornissamut isumaqatigiissutip 1951-imeersup kingornagullu ilassuteqartinneqartup qanoq isumaqatigiinniutigeqqinneqarsinnaaneranut kaammattuutininik saqqummiussisussamik Kalaallit/danskit allaffissornikkut ataatsimiititaliaannik pilersitsinissaq siunertarlugu danskit naalakkersuisuinut saaffiginneqqullugit Naalakkersuisut peqquneqarnissaannik Inatsisartut aalajangiiffigisassaattut siunnersuut, taamaalilluni illersornissamut isumaqatigiissutit aammalu amerikamiut Kalaallit Nunaanni sakkutooqarnerat Kalaallit Nunaannut iluaqutaanerusinnaaqqullugit.

Immikkoortoq 90: Illersornissamut isumaqatigiissut 1951-meersoq tamassumalu kingorna tapiliussatut isumaqatigiissutit tassunga attuumasut nalilersuineramik Inatsisartunut (imaluunniit tatigeqatigiinneq pillugu isertuussineq pisariaqassappat Nunanut Allanut Sillimaniarnermullu Ataatsimiititaliamut) UKA2016-imi saqqummiussinissaannik Naalakkersuisut peqquneqarnissaannik Inatsisartut aalajangiiffigisassatut siunnersuut.

Naliliinermi isumaqatigiissummi naalakkersuinikkut aningaasaqarnikkullu akuusut nunatsinnut qanoq pingaaruteqarneri nalilersorneqassapput, tamassumalu saniatigut Naalagaaffeqatigiinnerup iluani Namminersorlutik Oqartussat isumaqatigiissut malillugu pisinnaatitaaffiisa piginnaaneqarnerisalu erseqqissarneqarneri ilaatinneqassallutik.

Eqqissisimatitsinermut Avatangiisinullu Ataatsimiititaliaq qinnuteqarpoq oqaluuserisassani immikkoortup 71-ip aappassaaneerneqarnissaata UPA2017-imut kinguartinne-qarnissaanik. Immikkoortoq 71: Kingusinnerpaamik 1. januar 2017 aallarnerfigalugu ukiuni tallimani misiligummik terian-nissat, tulukkat naajallu eqqissisimatinneqarunnaaral-larnissat pillugu Naalakkersuisut peqquneqarnissaannik Inatsisartut aaliangiiffigisassaattut siunnersuut. Misileraanerup naareersimalernerani misileraanerup kingunerisaasa sunniutai pillugit nalilersuiffiginerat saqqummiunneqassalluni, ilaatigut eqqissisimatitsinerup atorunnaavissinnaanera pillugu nalilersuisoqassalluni.

Ilaasortat uku akornanni taasisarnerit pillugit isumaqatigiissuteqartoqarpoq:

Ane Hansen, Inuit Ataqatigiit aamma Justus Hansen, Demokraatit